

Cun optimissem en l'onn nov!

DA BARBARA JANOM STEINER,
PRESIDENTA DA LA REGENZA

Gia dapi intgins onns essan nus confruntads cun in ambient internaziunal difficil. In ambient caracterisà d'instabilitads politicas sco er da gronds indebitaments e da crisas finanzialas en blers pajais da la UE. Il fatg che bleras societads occidentalas sa polariseschan e sa separan pli e pli mussa l'inabilitad da l'Europa da vegnir a fin cun las colonnas da fugitivs ed è la raschun per ils quitads da blers umans. Las regiuns da conflict als cunfins da l'Europa, sco per exempel la guerra en Siria, n'arrivan betg da sa quietar e laschan pauca speranza da pasch. Il grond dumber d'attentats terroristics sgarschaivels en tut l'Europa chaschuna er tar nus pli e pli malsegirezza, er sche la Svizra è per fortuna stada schanegiada fin ussa. Quest ambient ha er consequenzas naziunalas. Il ferm franc svizzer ed ils tschains negativs engrevgeschan fermamain nossa economia. En il sectur da l'energia essan nus, sco chantun da forza idraulica, confruntads cun ulteriuras sfidas pervia da fauss impuls sin plaun internaziunal. Ed en il turissem ans sforzan in nov cumportament da consum e da temp liber sco er la midada dal clima da midar il pensar e da tschertgar novas ideas.

L'ambient è fitg pretensius Le las sfidas èn grondas. Malgrà tut dentant naging motiv, preziadas conburgaisas e preziads conburgais, da laschar pender il chau e d'avair dubis. Tenor il «Global Peace Index 2016» è la Svizra anc adina in dals pajais ils pli segirs dal mund. Stabilitad politica, pasch so-



ciala, in'economia fitg sviluppada, in sistem da furmaziun d'alta qualitad sco er infrastrukturas excellentas furman la basa per in avengnir segir. Cun las decisiuns da noss cussegl grond en il rom dal preventiv 2017 avain nus concludì ina vasta paletta da mesiras che laschan rinforzar e sviluppar vinavant il Grischun sco lieu economic, ma er il turissem: Cun investiziuns nettas da record, cun programs d'impuls per las regiuns, cun contribuziuns pli autas a projects per il svilup economic sco er per il turissem, cun dapli meds finanzials per las vischnancas or da la gulivaziun da finanzas e cun in pachet dad 80 milliuns per promover infrastrukturas relevantas per il sistem avain nus mess ina basa solida.

Lain pia cumenzar l'onn nov cun optimissem. Optimisticamain cun la cretta e cun la speranza en sasez sco er en il potenzial dal Grischun. Nus avain gia adina cumprovà che nus essan abels da vegnir vinavant er en temps difficils. Cun ina tenuta da basa positiva e cun la fidanza en nossas fermezzas vegnin nus a dumagnar cuminaivlamain las sfidas vegnintas. En quest senn As giavisch jau tut il bun, optimissem e sanadad en l'onn nov!

Cordiala gratulaziun a La Quotidiana

■ L'access a differentas funtaunas d'infurmaziun ed opiniuns è la basa per ina communitad democratica ed ha ina impurtanza enorma per il process da la furmaziun da la voluntad. Quai han probablamain er percurschì avant 20 onns ils fundaturs da La Quotidiana cur che la gasetta è vegnida fundada cun agid da l'Agentura da novitads ruman-tscha. Nus dastgain ans legrar che

La Quotidiana è er anc oz ina part indispensabla da nossa cuntrada da medias e da nossa diversitad linguistica. Grazia fitg a La Quotidiana per questa contribuziun preziusa e cordiala gratulaziun per il giubileum da 20 onns. A Martin Cabalzar ed a ses team giavisch jau er vinavant bler success ed in grond dumber da lecturas e lecturs cuntents. Barbara Janom Steiner